

**Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisaat**

(Avatangiisinut Pinngortitamullu Naalakkersuisoq)

**Saqqummiussissut  
Siullermeerneqarnera**

Naalakkersuisut sinnerlugit matumuuna Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisissaat saqqummiuppara.

Inatsisissatut siunnersuutip atuutilerneratigut annaassiniarnissamut upalungaarsimasut annertussusilerneqarnissaannut piginnaatitaaffik Naalakkersuisuniit kommunalbestyrelsimut nuunneqassaaq.

Ulorianartorsiorfiusinnaasut tunngavigalugit annertussusiliisarnermi pineqarpoq, annaassiniarnissamut upalungaarsimasut kommunimi pissusiviusut malillugit, aammalu kiffartuussinerup qaffasissusaa kommunalbestyrelsip innuttaasunut neqeroorutissatut kissaatigisaa aallaavigalugu annertussusilerneqartassasoq.

Ulorianartorsiorfiusinnaasut tunngavigalugit annertussusiliisarnermi uku akornanni ataqatigiissitsinissaq siunertarineqarpoq:

- 1) *Kommunimi ulorianartorsiorfiusinnaasut*, ulorianartorsiorfiusinnaasut suussusersinerisigut, aammalu ulorianartorsiorfiusinnaasut annertussusaannik aalajangersaaffiusumik misissueqqissaarnikkut nalunaarsorneqarsinnaasut.
- 2) *Kommunimi annaassiniarnissamut upalungaarsimasut*, ulorianartorsiorfiusinnaasuni pinaveersaartitsisinnaasut ikiuussinnaasullu.
- 3) *Kommunimi annaassiniarnissamut upalungaarsimasut kiffartuussinerisa qaffasissusissaa*, tassalu annaassiniarnissamut upalungaarsimasut innuttaasunut, suliffeqarfinnut il.il. pinaveersaartitsinikkut ikiuinikkullu suliniutaasa annertussusissaat.

Naliliineq malillugu ulorianartorsiorfiusinnaasunik naliliisarnerit annertusiartortinneqarnerisigut, aammalu upalungaarsimasut najukkani pissutsit tunngavigalugit naleqqussakkamillu annertussusilerneqartarnerisigut kommunimi upalungaarsimasut pilersaarusioneqartarnerat pitsaanerusoq anguneqarsinnaavoq.

Naliliineq malillugu ulorianartorsiorfiusinnaasut tunngavigalugit annertussusiliisarneq tamakkiisumik atuutsinneqalissaaq, aammalu kommunimi annaassiniarnissamut upalungaarsimasut ilinniartitaanikkut sunut piginnaaneqarnissaannut piumasaqaatit minnerpaaffilerneqassanngillat. Ulorianartorsiorfiusinnaasut tunngavigalugit annertussusiliisarnermi tunngavissaq pingaarneq tassaavoq, upalungaarsimasut najukkani pissusiviusut tunngavigalugit annertussusilerneqartassasut, aammalu Inatsisartut inatsisaat

malillugu suliassat naammassineqarsinnaangorlugit, upalungaarsimasut aqqissuussaanut kommunalbestyrelsip nammineerluni ilusilersortassagaa. Inatsisissatut siunnersuut naapertorlugu annaassiniarnissamut upalungaarsimasut allaffissorinikkut suliassaasa upalungaarsimanermut pisortap aammalu kommunimi allaffissornermik suliaqartut allat suleqatigiillutik naammassineqarsinnaanissaat akornusersimaneqanngilaq.

Taamatut oqaaseqarlunga Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisaattut siunnersuut Inatsisartuni kajumittumik suliassanngorlugu tunniuppara. Siunnersuutip aappasaanneeraneqannginnermini Inatsisartut Attaveqarnermut Ineqarnermullu Ataatsimiititaliaannit suliarineqarnissaa siunnersuutigaara.